

## **YONI yana leta nagona**

Hida Yoni yana leta nagona badi tovetumagana melala tulina tulina Esiya ana fafaliya himiyami-ma agaidiya gi'etoladina. Yoni givesilakai ada Efeso againe gimiyami tu gi'etoladi.

Bana Yoni yana inuba luhei. Sa'eyana ma tovetumagana gilumageyedi be Yaubada Tauna kadu Natuna Yesu Keliso agaidiya hinamiyave'avina. Yaubada againe hinuwanuwa lakahina amine, meda gilubodadi be tobohiyadiyao agaidiya hidanuwanuwa lakahina. Kadu yana inuba anavelu ma vehawala ve'alololona fa'ina gi'ago'abiyedi. Badi tove'alololo higahe vaita wowoda gaitoma koyona. Kaliva wowoda koyona yana abaga fa'ina Keliso keke velemona ada nuya gida'oseni be gidavekaliva. Yana miyami vaita kaliva amine tu keke velemona wawowona kadu keke velemona Yaubada Natuna. Kadu higahe vaita nuwahuya nuwanuwa hawahawahegena gitubutagona ada dewa yegayegana keke hidanuwenuwani. Au hidedemi badi Keliso nibaineyao hivehawala fa'ina, Yoni nuwanuwana yadi fwaya nuwanuwa velemo'ena againe ginayawelina, ada Yesu yana vekaliva kadu ve'ahawahawahega fa'ina gigahevagadona. Leta dobona hidede amine.

Leta ana nuwanuwa nafona. 1:1-4

Mahalina ana dewa tulina, uyuyu ana dewa tulina ma. 1:5-2:17

Keliso nibaineyao yadi fwaya fa'ina gi'ago'abiyedi. 2:18-29

Yaubada natuneyao kadu Setani natuneyao adi nuwave'uve'u fa'ina. 3:1-4:6  
 Yaubada yana nuwanuwa hawahawahegana fa'ina ve'ahawahawahega natuneyao adi lauboda. 4:7-5:5  
 Yesu Keliso inubana ana tohawavemogatala kadu yawai-vagata fa'ina. 5:6-21

*Tomiya-vagata ana egana Bona, higa Yesu Keliso fa'ina*

*Yoni gilukahihi.*

<sup>1</sup> Keke gavana fa'ina tu Bana Bona yawai-vagata velemo'ena inubana ma fa'ine ime afositolo avenuwa'ata. Boi tuwai-mo'ena babi ana abave'inuba ana toveya, Bana Bonai-nadi gimiyamiya-vagata, ada muliya kaliva-mo'ena yana gahe ime anogalina, kadu taumeyao matameya a'itana, kadu taumeyao nimameya a'abina. <sup>2</sup> E, kaliva ana egana Yawai-vagata velemo'ena Tauna gi'ivemogatalina be ime a'itana. Ada gavaimi a'itana amine a'awatalatalainemi kadu avenuwa'atami. Ada Bana Yawai-vagata amanadi boi tuwai-mo'ena Tamada buye himiyamiya-vagata, ada muliya ime agaimeya Tauna gi'ivemogatalina. <sup>3</sup> Ada ime Bana Yawai-vagata velemo'ena a'itana kadu yana gahe anogalina, ada Bana fa'ine avenuwa'atami. Au hidedemi avenuwa'atami be higa ime'eyao Badi Tamada kadu Natuna Yesu Keliso buye avevido avedayaga amine, meda kadu omi'iyao mena vevido-nadi wana'aya'ayaunena. <sup>4</sup> Ada keke gavana fa'ina tu omi agaimiya ga'etoladi

be higa moya'aida kanavevido kanavedayaga yo kanavemwamwala-mo'a.

*Mahalina againe kananunudadana.*

<sup>5</sup> Tu hida gahe Yaubada Natuna againe anogalina ada omi avenuwa'atami, higa Yaubada Bana mahamahalinaga. Uyuyu keke tamo Bana againe gidamiyami, keke. <sup>6</sup> Ka'i kanagahe kanagayo, "Iya Bana'e buye avevido," ka'i hidede amine kanagahe tu nuwanuwa uyu'uyuyuna againe kanunudadana, au kafwaya kadu keke nuwanuwa velemo'ena amine kadahululuva.

<sup>7</sup> Tu Yaubada mahalina againe gimiyamiyavagata. Ka'i ide tovetumagana Bana amine mahalina againe kanunudadana, au ime'eyao kadu omi'iyao moya'aida ada ayauna kadu yada nuwanuwa sa'eyana kamimiyami, ada Yaubada Natuna Yesu dayagina gimadu-ma againe ase'aseda gikolakolana be yada nuwanuwa koyona moya'aina givaihegena.

<sup>8</sup> Ka'i ide kanagahe kanagayo, "Keke nuwanuwa koyona ase'asekuya gidadauda," au taudeyao agaideya kave'alololo kadu Yaubada yana nuwanuwa velemo'ena keke nuwahinagedeya gidadauda. <sup>9</sup> Ka'i yada dewa koyona Yaubada matane kanayauyauna, au Bana giwonadabadaba amine ginafaisewa kadu yana nuwanuwa tunutunugina amine ginahuluva, higa yada dewa koyona ginayawelina kadu ase'aseda ana nuwanuwa koyona moya'aina ginakolahegehegena. <sup>10</sup> Ka'i ide kanagahe kanagayo, "Keke tamo dewa koyona

gadafaisewani,” au vaita kadagahe kadagayo, “Bana Yaubada tofwaya,” fa'ina Bana'e kaliva fa'ideya ahe gigahe vaita moya'aida tokoyona. E, ka'i yada dewa koyona kanahawavekemena digo, Bana bonana keke ase'asedeya gidadauda.

## 2

### *Yesu Keliso ada Toveluga.*

<sup>1</sup> Ho natukweyao, hida yaku nuwanuwa agaimiya ga'etoladina be keke dewa koyona wanafaisewani fa'ina. Tu ka'i tamo hakwadi agaideya unakoyo digo, ada Toveluga gimimiyami, Bana Yesu Keliso Toyegayegana-mo'a, ada tova moya'aina yana gahe againe Tamada matane gilulugolegole. <sup>2</sup> E, Bana Tauna gi'alika higa yada koyona ana laufata Bana giyawelina be Yaubada yana ila'a ginahavaina fa'ina, tu keke ide'eyaogaga yada koyona ana laufata au tomiyababi moya'aida yada koyona ana laufata fa'ina gi'alika.

<sup>3</sup> Atu ka'i Yaubada yana vehimeya ka'ita'itave'avina o, ide adafaiweya kanagahe kanagayo, “Wona velemona Yaubada gahalamanena.” <sup>4</sup> Hai kaliva hidedemi ugahe, vaita o Yaubada uhalamanena tu yana vehimeya udibudibutoyogena, au o'eni tofwaya, nuwanuwa velemono'ena keke ase'aseniya gidadauda. <sup>5</sup> Tu hai kaliva Yaubada bonana u'abi'abina, medema ya nuwanuwa Yaubada againe use-'owona. Ide Yaubada buye kave'atutamo'aida ma gavaiya'amine kanahalamaneni velemono'ena?

Ka'i Bana bonana ka'abi'abina o, ide Yaubada againe kamiyave'avina. <sup>6</sup> E, hai kaliva gigaye gigayo, “Iya Yaubada buye ave'atutamo'aima,” medema gilubodana be Yesu Keliso gihuluva amine, kadu gidahuluhuluva.

*Vehimeya ivaguna higa hawahega tobohiyadeyao fa'idiya.*

<sup>7</sup> Tobohiyakweyao, keke vehimeya ivaguna fa'ina gada'etoladi, keke. Au vehimeya tuwaina fa'ina ga'etoladi, medema boi tuwaina wavebutu wavetumagana ana toveya wavaina. E, vehimeya tuwaina mena bana higa venuwa'ata tuwaina ahe wanogalina. <sup>8</sup> Tu hida vehimeyai-nadi ma vaita ivaguna, fa'ina mahalina velemono'ena gilakalakata be gitutuvemahalida againe uyuyu ana tova gihavahavaina. Ada vehimeya ivaguna bana au velemono'ena ma Keliso giseyemaunena, kadu omi yami huluva againe waseyemaunena.

<sup>9</sup> Hai kaliva gigayo, “Iya mahalina againe gamimiyami,” tu tobohiyana sa'eyana againe ginuwanuwakoyo, au medema aimo uyuyu againe gimimiyami. <sup>10</sup> Hai kaliva tobohiyana fa'ina ginuwanuwa lakahina medema mahalina againe gimimiyami, ada keke tamo gavadi ase'asene gidadauda-yo ginatutumadumadu-yo koyona againe ginabe'u, fa'ina mahalina bana yana eda gitutuvemahalina. <sup>11</sup> Tu hai kaliva tobohiyana againe ginuwanuwakoyo, medema uyuyu againe gimimiyami kadu uyuyu

---

**2:6:** Hi 9:24 Lo 3:25, Yo 1:29, 11:52 1Yn 1:6,8      **2:6:** Yo 14:21,23, 1Yn 4:12, 5:3 Yo 13:15

againa ginunudadana, ada eda tunutunugina ginufaniyena fa'ina matana gi'uyuyuna.

<sup>12</sup> Natukweyao, omi tovetumagana ma agaimiya ga'etoladi, fa'ina Yesu Keliso yana alika againa Yaubada yami koyona giyawelina.

<sup>13</sup> Kadu kamakweyao, omi agaimiya ga'etoladi fa'ina Bana'e boi tuwai-mo'ena babi ana abave'inuba againa gimiyamiya-vagata ma wahalamanena. Kadu kaikweyao, omi agaimiya ga'etoladi fa'ina kaliva koyona Setani againa walugaviya be wafaiwalahegehegena. <sup>14</sup> Kadu natukweyao, omi agaimiya ahe ga'etoladi fa'ina Tamada wahalamanena. Kadu kamakweyao, omi agaimiya a ga'etoladi fa'ina Bana'e boi tuwai-mo'ena babi ana abave'inuba againa gimiyamiya-vagata amanadi wahalamanena. Kadu kaikweyao, omi agaimiya a ga'etoladi fa'ina ase'asemiya wafifaiwala, ada Yaubada bonana ase'asemiya gidadauda, ada Setani againa walugaviya be wafaiwalahegehegena.

*Babi ana dewa keke nuwami ginavaini.*

<sup>15</sup> Tu keke wanahawahegemi be hida babi ana nuwanuwa againa nuwami wanaseni. Kadu keke babi ana kikaiwabu againa nuwami wanaseni. Ka'i babi ana nuwanuwa nuwami givaina digo, keke yami nuwanuwa Tamada againa wadaseni.

<sup>16</sup> Wa'ita, gavadi gavadi moya'aina babi againa hive'inuba, medema inubadi keke Tamada againa, higa kaliva dibudi koyona ana nuwanuwa ita'italuvadigana, kadu gavadi gavadi fa'idiya

matadi itadawadawanina kadu gavadi moya'aina fa'ina taudiyao adi egana hikikilakahina. Mena gaitomai-dina inubadi ma keke Tamada againe, au hida babi againe hive'inuba. <sup>17</sup> Kadu hida babi ana nuwanuwa gihavahavaina, kadu gaitoma moya'aina tomiyababi hi'ita'italuvadigena-ma gihavahavaina tu hai kaliva Yaubada yana nuwanuwa gidibudibumuhigena, medema ginamiyamiya-vagata.

*Keliso Nibaina Lakahina fa'ina.*

<sup>18</sup> Natukweyao, hida tova ana lauyabu gilurveda'ufo-mo'a. Hidema tovai-nadi Keliso Nibaina Lakahina ginalakayemu ma ahe wanogalina, ada au Keliso nibaineyao higa kelisofwayafwaya moya'aidi ahe hilakayemu. Badi nibaineyao ahe hilakayemu fa'ina, hida tova ana lauyabu gilurveda'ufo ma kahalamanena. <sup>19</sup> Hida kalivai-dina keke velemo'ena ide tovetumagana yada yo'o kalivadi, ada hidema fa'ina himaduvehaileda. Ka'i badi velemo'ena yada yo'o kalivadi digo, badi ide buye aimo kadamiyami. Tu badi a hina, fa'ina ide kahalamane-hagihagiyena badi moya'aidi keke yada yo'o kalivadi.

<sup>20</sup> Tu Kaliva Mahamahalina higa Keliso Bana Alu'aluwa Mahalina omi agaimiya gihawahegena be givemagami, ada hidema fa'ina omi moya'aimi nuwanuwa velemo'ena wahalamanena. <sup>21</sup> Tu hida leta ma keke vaita nuwanuwa velemo'ena wadafaniyeni fa'ina gada'etoladini, keke. Ga'etoladi fa'ina makewa omi nuwanuwa velemo'ena wahalamanena, kadu keke tamo

fwaya Yaubada yana nuwanuwa velemono'ena againe gidave'inuba ma wahalamanena. <sup>22</sup> Tu hakwa'adi ma tofwaya? Hai kaliva sa'eyana yo'o hinfadiya Yesu fa'ine ginagahe ginagayo, “Yesu keke Keliso Yaubada yana Tovegida amanadi,” medema kalivai-nadi tofwaya, ada bana hidevama ana egana Keliso Nibaina Lakahina. E, Tamada kadu Natuna buye inubadi gikilowena higa vaita Yesu Keliso Tamana mali kaliva, keke Yaubada. <sup>23</sup> Gaveyao Yaubada Natuna inubana hikilowena, medema agaidiya keke Tamada gidamiyami. Tu gaveyao hinagahe hinagayo, “Yesu Bana Yaubada Natuna,” medema agaidiya Tamada gimimiyami.

*Yaubada bonana kadu Alu'aluwa Mahalina  
ami to'itave'avina.*

<sup>24</sup> Tu omi'iyao ma wana'itave'avimi be bona boi tuwaina wavebutu wavetumagana againe wanogalina amanadi nuwahnagemiya ginaduva-vagata. Ka'i mena bonai-nadi boi tuwaina wanogalina-ma ase'ase'emiya ginadauda, au Tamada againe kadu Natuna againe wanamiyamiyave'avina tova moya'aina. <sup>25</sup> Ada Keliso Tauna ide agaideya giwonadabadaba gigayo, “Yawai-vagahimi ganavelemi.”

<sup>26</sup> Au hida Keliso nibaineyao yadi vehawala fa'ina ga'etoladi be badi nuwanuwadi yadi fwaya againe hinanuwa'abiyemi amanadi yadi dewa fa'ina ganavenuwa'atami. <sup>27</sup> Tu omi'iyao ma Keliso Alu'aluwa Mahalina



agaimiya gihawahegena be givemagami, ada Tauna nuwahnagemiya gimimiyami tova moya'aina. Au ami vehawala fa'ina keke mali kaliva gidalubodami. Bana anakaibe ami tovehawala velemo'ena, nuwanuwa moya'aina givhavehawalemi, ada yana vehawala keke fwaya, au velemo'ena. Ada au Alu'aluwa Mahalina givhawalemi amine, Keliso againe wanamiyave'avina.

<sup>28</sup> E, natukweyao, Bana againe wanamiyave'avina be higa ginayewa'ela ana toveya keke kanamatauta fa'ina, kadu keke yada wawowomumu kanaveuyeni. <sup>29</sup> Au Keliso Bana yegayega-mo'ena ma wahalamanena. Kadu anafaiweya gaveyao yadi dewa yegayegana, medema Yaubada natuneyao. Au hidedemi amifaiweya wanahalamanena.

### 3

#### *Omi Yaubada natuneyao amine wanahuluva.*

<sup>1</sup> Iyoi! Tamada yana hawahega ide agaideya gavatubuga! E, nuwanuwana lakahina ide'eyao fa'ina gihawavenatuneda, higa ada egana Yaubada natuneyao. Ada makewa'e ide Yaubada natuneyao. Hidema fa'ina tomiyababi keke Yaubada hidahalamaneni-ma ide hifaniyeda, fa'ina Bana Tamada keke hidahalamaneni. <sup>2</sup> Ho tobohiya'ase'asekweyao, tova adamoya ide Yaubada natuneyao, tu tova mulina ide vaita gaveyao kikaiwabudiyao amine kanamiyami medema keke kadahalamane-hagihagiyeni. Tu

gaitoma sa'eyana kahalamanena higa Keliso ginayewa'ela ana toveya, ide ada ita'ita Keliso ana ita'ita amine ginalakayemu, fa'ina kaliva-mo'ena ide kana'itana. <sup>3</sup> Ada gaveyao moya'aimi nuwanuwami Keliso ana ita'ita amine ami ita'ita ginalakayemu ma fa'ina walulauboda, medema ase'asemi wa'ita'itave'avina be Keliso yegayega-mo'ena gimimiyami amine, meda omi yegayegamiyao wanamiyami.

<sup>4</sup> Tu hai kaliva koyona gifaisewana, medema Yaubada yana vehimeya giyawelina. E, dewa koyona ana egana vehimeya ana aiyawela. <sup>5</sup> Omi wahalamanena Keliso gihobu'ela be kaliva yada koyona ginavaihegena fa'ina. Kadu wahalamanena keke tamo gavadi koyona Bana againe gidadauda. <sup>6</sup> Gaveyao Keliso againe himiyamiyave'avina, medema keke hidahuluhuluva koyona, tu gaveyao tova moya'aina hihuluhuluva koyona, medema Keliso inubana keke hidahalamaneni kadu Keliso Tauna keke hidahalamaneni.

<sup>7</sup> Natukweyao, wana'itave'avimi be keke tamo hakwadi yana fwaya againe ginanuwa'abiyemi. Hai kaliva yana dewa yegayegana tova moya'aina, medema ase'asena yegayegana. Bana Keliso yegayegana amine, kadu bana kalivai-nadi yegayegana. <sup>8</sup> Hai kaliva tova moya'aina gihuluhuluva koyona, medema Setani yana kaliva, fa'ina huluva koyona medema Setani yana huluva. Boi tuwai-mo'ena babi ana abave'inuba againe huluva koyona givebutuna tu ginunauwena tova adamoya. Ada hidema ana inuba Yaubada Natuna gihobu'ela,

higa Setani yana gugai ginayawelina fa'ina.  
<sup>9</sup> Hai kaliva Yaubada natuna, medema keke gidahuluhuluva koyona, fa'ina Yaubada yana nuwanuwa bana nuwane gidadauda. E, bana kaliva alu'aluwana Yaubada yawaine gitubugahavagi fa'ina keke anafaiweya ginahuluhuluva koyona. <sup>10</sup> Gavaiya'amine kanahalamaneni gaveyao Yaubada natuneyao kadu gaveyao Setani natuneyao? Hai kaliva yana dewa keke tunutunugina, medema keke Yaubada natuna. Meda anafaiweya hai kaliva tobohiyana againe keke gidanuwanuwa, medema keke Yaubada natuna. Au hidede amine kahalamanena.

*Taumiya agaimiya wanave'ahawahawahega.*

<sup>11</sup> Tu venuwa'ata boi tuwaina wavebutu wavetumagana againe wanogalina amanadi hidede amine. Taudeyao agaideya kanave'ahawahawahega. <sup>12</sup> Ada keke Keni Adama natuna amine kanahuluva. Bana Setani yana kaliva ada taina velemo'ena giluve'alikana. Gavana fa'ina-yo giluve'alikani? Me Keni yana huluva koyona tu taina yana huluva tunutunugina, au hidema fa'ina giluve'alikana. <sup>13</sup> Tobohiyakweyao, ka'i tomiyababi Yaubada keke hidahalamaneni-ma omi agaimiya hinavenibaina amine, keke wanayaulowoga, fa'ina Keni Setani yana nuwanuwa koyona gihuluvina amine, kadu badi omi hinahuluvimi. <sup>14</sup> Tobohiyadeyao fa'idiya kahawahawahegeda fa'ina, ide kahalamanena alika-vagata ana eda kahege tu yawai-vagahida ana edeya kadamana

be kananauna. Hai kaliva badi tobohiyamomo fa'idiya keke unahawahawahege, medema aimo alika ana eda againe unanauna. <sup>15</sup> Hakwa'adi tobohiyana againe ginuwanuwakoyo, medema toluve'alika, ada omi wahalamanena toluve'alika keke yawai-vagahina ana eda againe gidanauna.

<sup>16</sup> Au gavaiya'amine hawahega ana dewa kanahalamaneni? Me Keliso ide fa'ideya yawaina gihawahegena. Meda gilubodada be tobohiyadeyao fa'idiya yawaida kadahawahegena. <sup>17</sup> Ka'i kaliva sa'eyana wakalivana tu tobohiyana gina'itana, anaga keke yana lokoloko keke ada keke gidahinekalikaliyeni yo gidavelugani, au hawahega Yaubada againe keke-mo'a bana nuwahinagene gidadauda. <sup>18</sup> Natukweyao, keke kebuladeya o ka'i meyadeya tobohiyadeyao fa'idiya kanahawahegeda, au kanahawahegeda velemo'ena be nimadeya o ka'i agedeya kanavelugadi.

*Yaubada natuneyao keke Bana matane hinamatauta.*

<sup>19</sup> Ka'i tobohiyadeyao fa'idiya kanahawahegeda velemo'ena, au Yaubada yana nuwanuwa velemo'ena againe kamimiyami ma kanahalamanena. Kadu'e, ka'i kanahawahegeda velemo'ena, au Yaubada matane adafaiweya kanamiyami keke yada wamatauta. <sup>20</sup> E, ka'i yada koyona fa'ina vita ase'asedeya kana'ayaunena, au yada wanuwayamumu Yaubada matane adafaiweya kanamiyami, fa'ina

Yaubada yana halamana ide yada halamana gitubuhegena, au Bana yada nuwanuwa moya'aina inubana gihalamane-'owona, ada Bana againe kahawahegeda fa'ina yada koyona ginayawelina.

<sup>21</sup> Tu tobohiyakweyao, ka'i kahalamanena koyona keke kadafaisewani ada hidema fa'ina keke vita ase'asedeya kada'ayauneni, au yada wa'atuvefa'ila Yaubada matane adafaiweya kanamiyami. <sup>22</sup> Kadu gavadi gavadi fa'ina kanave'o'ola, medema ginaveleda, fa'ina yana vehimeya ka'ita'itave'avina ada yana nuwanuwa amine kahuluhuluva. <sup>23</sup> Ada yana vehimeya fa'ina ganakivetuvetunumi, higa Natuna Yesu Keliso ana egana kanavetumaganena, ada Keliso givehimeyeda amine taudeyao agaideya kanave'ahawahawahega. <sup>24</sup> Omi gaveyao Yaubada yana vehimeya wa'ita'itave'avina, medema Yaubada againe wamiyamiyave'avina ada Bana'e omi agaimiya meda anafaiweya gimiyamiyave'avina. Ada Yaubada ide agaideya gimiyamiyave'avina ma gavaiya'amine kahalamaneni? Me Bana Alu'aluwana giveleda be Tauna nuwahinagedeya gimimiyami fa'ina kahalamanena.

## 4

*Alu'aluwa Mahalina gaveyao agaidiya  
gimimiyami ma*

*wananuwenuwena.*

1 Tobohiya'ase'asekweyao, keke kaliva moya'aidi yadi laumamala wanavetumaganeni vaita hidagahe velema'ena. Au inubadi wananuwave'uve'una be wanahalamane-hagihagiyena ka'i Alu'aluwa Mahalina yana nuwanuwa amine hilukahihi o ka'i keke. E, tolaumamala wananuwave'uve'udi fa'ina tove'alololo moya'aidi higa vaita Yaubada bonana ana to'awatalatalaina amine amanadi fafali tulina tulina agaidiya hilakayemu be hiffaisewa.

2 Gavaiya'amine wanahalamaneni Yaubada Alu'aluwana tolaumamala awane gilukahihi? Me hai kaliva yana laumamala againe ginagahe ginagayo, “Yesu Keliso babiya gihobu'ela be givekaliva,” medema againe Yaubada Alu'aluwana gimimiyami. <sup>3</sup> Atu hai kaliva ginagahe ginagayo, “Yesu Keliso keke babiya gidahobu'ela gidavekaliva,” medema againe Yaubada Alu'aluwana keke gidamiyami. Au hida gahe inubana amanadi bana Keliso Nibaina Lakahina alu'aluwana againe gilakayemu. Bana aimo gina'ela ma valeyana ahe wanogalina, ada au a gi'ela babiya gimimiyami.

<sup>4</sup> Tu natukweyao, omi Yaubada yana kaliva, ada badi fwayafwayadiyao wafaiwalahegehegedi, fa'ina Alu'aluwa Mahalina omi agaimiya gimimiyami-ma babi ana kaliva adi tovehimeya gifaiwalahegena. <sup>5</sup> Badi tove'alololo ma babi ana kaliva keke Yaubada yana kaliva, ada au babi ana nuwanuwa fa'ina hilulumamala ada tomiyababi Yaubada keke hidahalamaneni-ma bonadi hivenogalena. <sup>6</sup> Tu ide'eyao ma Yaubada yana kaliva. Gaveyao Yaubada hihalamanena,

medema bonada hivenogalena, ada gaveyao keke Yaubada yana kaliva, medema keke bonada hidavenogaleni. Au hidede amine alu'aluwa adi'iselu inubadi kanuwave'uve'una, higa Alu'aluwa Mahalina nuwanuwa velemono'ena inubana tu alu'aluwa uyu'uyuyuna ve'alololo inubana.

*Yaubada yana nuwanuwa hawahawahegana fa'ina.*

<sup>7</sup> Tobohiyakweyao, taudeyao agaideya kanave'ahawahawahega, fa'ina Yaubada mena nuwanuwa hawahawahegana inubana. Ada gaveyao tobohiyadiyao fa'idiya hihawahawahegedi, medema Yaubada natuneyao ada Yaubada hihalamanena. <sup>8</sup> Wa'ita, Yaubada yana nuwanuwa matatabuna hawahawahegana. Hai kaliva keke tobohiyaneyao fa'idiya gidahawahegeni, medema keke Yaubada gidahalamaneni, fa'ina keke nuwanuwa hawahawahegana amine tobohiyaneyao gidahuluvidi. <sup>9</sup> Gavaiya'amine Yaubada yana hawahega ide agaideya giseyemauneni? Me Bana Natuna anakaibe'u-mo'a gi'iveninisena ada babiya gihobu'ela be yawaida velemono'ena Bana Natuna againe kanavaina. <sup>10</sup> Ada mena hawahega inubana ma keke ide Yaubada againe yada nuwanuwa kadaseni, au Bana'e ide agaideya yana nuwanuwa gisena, ada Natuna gi'iveninisena be Bana gina'alika, higa yada koyona ana laufata Bana ginawahina be Yaubada yana ila'a ginahavaina fa'ina.

<sup>11</sup> Tobohiya'ase'asekweyao, ka'i Yaubada hidede amine Tauna ide fa'ideya gihawahegena, au gilubodada be ide taudeyao agaideya kadave'ahawahawahega. <sup>12</sup> Keke tamo hakwadi Yaubada gida'itani. Tu ka'i taudeyao agaideya kanave'ahawahawahega amine, Yaubada agaideya gimiyamiyave'avina ada yana nuwanuwa hawahawahegana ase'asedeya gitubutubuga-mo'a.

<sup>13</sup> Kadu'e, ide Yaubada againe kamiyamiyave'avina ada Bana'e ide agaideya gimiyamiyave'avina ma hidede amine kahalamanena, higa Bana Alu'aluwana giveleda be Tauna nuwahinagedeya gimimiyami. <sup>14</sup> Ada Tamada Natuna gi'iveninisena be tomiyababi ginakibababaleda ma ime a'itana kadu a'awatalatalainena. <sup>15</sup> Gava kaliva yo'o hinafadiya ginagahe ginagayo, “Yesu velemono'ena Yaubada Natuna,” ka'i hidede amine ginagahe, au Yaubada bana againe gimiyamiyave'avina, ada bana kaliva Yaubada againe gimiyamiyave'avina. <sup>16</sup> Ada au ide taudeyao kahalamanena kadu kanuwave'avina Yaubada yana nuwanuwa ide agaideya giseusena.

E, Yaubada yana nuwanuwa matatabuna hawahawahegana, ada gava kaliva mena Yaubada yana nuwanuwai-nadi amine gihuluhuluva, bana Yaubada againe gimiyamiyave'avina ada Yaubada bana kaliva againe gimiyamiyave'avina. <sup>17</sup> Yaubada yana nuwanuwa hawahawahegana



ase'asedeya giseusena be gitubutubuga-mo'a, higa vaita adafaiweya kana'asevatu vedewayauga ana toveya. Ada au medema tovai-nadi adafaiweya kana'asevatu, fa'ina Keliso yana wa'asevatu Yaubada matane gimimiyami amine, meda ide hidei babiya kamimiyami yada wa'asevatu Yaubada matane. <sup>18</sup> Hai kaliva Yaubada yana nuwanuwa bana againe gi'aya'ayaunena, medema matauta keke anafaiweya ase'asena gina'onani. E, Yaubada yana nuwanuwa hawahawahegana agaideya gitubuga-mo'a fa'ina, matauta giwavina. Ka'i kamatamatauta, au yada matauta inubana vaita Yaubada ginavematahiwadiyeda. Ada gaveyao tomatauta, medema agaidiya Yaubada yana nuwanuwa hawahawahegana ana halamana aimo keke gidatubuga-mo'a.

<sup>19</sup> Kadu'e, Yaubada yana nuwanuwa hawahawahegana ide agaideya gimidisena fa'ina ide kadu yada nuwanuwa hawahawahegana kaseusena. <sup>20</sup> Ka'i tamo hakwadi ginagahe ginagayo, "Iya nuwanuwaku Yaubada," tu tobohiyana againe ginuwauwakoyo, bana kalivai-nadi tofwaya, keke velemono'ena nuwanuwana Yaubada. Wa'ita, ka'i keke nuwanuwana tobohiyana ahe gi'ita'itana amanadi, kadu keke nuwanuwana Yaubada, Bana'e keke gida'itani amanadi. <sup>21</sup> Ada au Keliso hida vehimeya giveleda, higa gava kaliva yana nuwanuwa Yaubada againe giseusena, gilubodana be kadu tobohiyana againe yana

nuwanuwa gidaseusena.

## 5

*Tovetumagana adifaiweya be babi ana nuwanuwa*

*hinafaiwalahegehegena.*

<sup>1</sup> Kadu'e, gaveyao hivetumagana higayo, “Yesu au Keliso Yaubada yana Tovegida amanadi,” medema Yaubada natuneyao. Ada gaveyao nuwanuwadi Tamada, medema kadu nuwanuwana natuneyao. <sup>2</sup> Gavaiya'amine kahalamaneni Yaubada natuneyao agaidiya yada nuwanuwa kaseuseni? Me Tamada Yaubada againe yada nuwanuwa kaseusena ada yana vehimeya ka'ita'itave'avina. <sup>3</sup> Ka'i velemo'ena Yaubada againe yada nuwanuwa kasena, au yana vehimeya ka'ita'itave'avina. Ada yana vehimeya keke vitana, au ihayana. <sup>4</sup> Ada au adafaiweya kana'ita'itave'avina, fa'ina gaveyao Yaubada natuneyao, medema adifaiweya babi ana nuwanuwa hinafifaiwalahegehegedi. Ada gavaiya'amine babi ana nuwanuwa kanafaiwalahegehegedi? Me yada vetumagana againe adafaiweya wai kananagona be babi ana nuwanuwa ginayewa. <sup>5</sup> E, hakwa'adi anafaiweya babi ana nuwanuwa ginafaiwalahegehegedi? Bana givetuvetumagana amanadi hida Yesu au Yaubada Natuna, au bana anakaibe anafaiweya wai ginanagona be babi ana nuwanuwa ginayewa.

---

4:21: 2Ko 1:21-22 Yo 3:17 Yo 6:69 1Yn 4:10 5:5: Yo 14:15,23-24, Md 11:30 Yo 16:33 Lo 8:37

*Yaubada Yesu Keliso inubana fa'ina gihawavemogatala.*

<sup>6</sup> Ada Bana Yesu Keliso ma babiya gihobu'ela, ada gi'ela yana wa'iyayaya luhei, higa gufa againe gibafitaiso kadu dayagina gimadu. Gufa againe gibafitaiso tu keke mededemagaga, au kadu dayagina gimadu, higa yana iya'iyaya luhei, gufa dayaga. <sup>7</sup> Ada Yesu yana ela au hidede amine ma Alu'aluwa Mahalina gi'alakakilina, ada Bana yana hawavemogatala keke fwaya, au velemo'ena. <sup>8</sup> E, gaitoma tohiye Bana Yesu Keliso fa'ine hihawahawavemogatala, sa'eyana ma Alu'aluwa Mahalina, anavelu gufa, kadu anaveto dayaga. Ada hida tohawavemogatala tohiye yadi gahe leleleya, higa Yesu au Yaubada Natuna. <sup>9</sup> Tomiyababi yadi awatalatalaina kavetumaganena ada medema gaitoma lakahina, tu Yaubada yana awatalatalaina gaitoma lakahi-mo'ena, fa'ina yana awatalatalaina kanavetumagane-mo'ena. Ada au Bana Yaubada gavaimi gihawavemogatala? Me Natuna fa'ine gihawavemogatala. <sup>10</sup> Gava kaliva Yaubada Natuna givetuvetumaganena, medema Yaubada yana hawavemogatala Natuna fa'ine bana ase'asene gidadauda. Tu gava kaliva Yaubada yana gahe Natuna fa'ine keke gidavetumaganeni, medema vaita gidagayo, “Yaubada tofwaya,” fa'ina Yaubada yana hawavemogatala Natuna fa'ine keke gidavetumaganeni. <sup>11</sup> Ada hawavemogatalainadi hidede amine. Yaubada yawai-vagahida giveleda ada mena yawai-vagata Natuna againe

give'inuba. <sup>12</sup> Gaveyao nuwahnagemiya Yaubada Natuna Tauna gimimiyami, medema yawai-vagahimi ahe wanuhagana, tu gaveyao nuwahnagemiya Yaubada Natuna Tauna keke gidamiyami, medema yawai-vagahimi keke wadanuhagani.

*Yawai-vagahida ana nuwanuwa fa'ina.*

<sup>13</sup> Tu omi Yaubada Natuna ana eganeya wavetuvetumagana amanadi yami leta au hidede amine ga'etoladina be wanahalamanena yawai-vagahimi ahe wanuhagana. <sup>14</sup> Ka'i Yaubada yana nuwanuwa amine kanave'o'ola, au gavadi gavadi fa'ina kanave'o'ola, medema ginavenogaleda. Ada hidedemi ginavenogaleda fa'ina, ide Yaubada matane adafaiweya kana'asevatu. <sup>15</sup> E, tova moya'aina yada ve'o'ola givenovenogalena. Ada givenogaleda velemono'ena ma kahalamanena fa'ina, kadu yada ve'o'ola guwana ahe kanuhagana ma kahalamanena.

<sup>16</sup> Tu ka'i tamo hakwadi tobohiyana tovetumagana agaimiya koyona sa'eyana gifaisewana ma gina'itana, ada dewai-nadi fa'ina keke alika-vagata ginanuhagani, ka'i yana koyona hidede amine gina'itana digo, gilubodana be Yaubada againe tobohiyana fa'ine gidave'o'ola be yawaina ivaguna ginavelena. Au tamo gava koyona fatana keke alika-vagata ma fa'ine hidede amine gagahe. Tu tamo koyona sa'eyana ma ka'i kaliva ginakive'avi-vagahina be ginanunauwena tu fatana alika-vagata ginanuhagana, au keke vaita ganagahe medema koyonai-nadi fa'ina Yaubada

againé wanave'o'ola. <sup>17</sup> Huluva koyona tulina tulina ana egana au koyona, tu tamo koyona sa'eyanaga fa'ina alika-vagata kananuhagana.

<sup>18</sup> Ada ide kahalamanena keke tamo hakwadi Yaubada natuneyao agaidiya koyona gidafifaisewani be gidanunauweni lauva tunugina, fa'ina Yaubada Natuna gilulugolegolena be bana kaliva koyona Setani keke anafaiweya ginakivekoyoni. <sup>19</sup> Kadu kahalamanena ide Yaubada natuneyao,

ada tomiyababi moya'aidi Yaubada keke hidahalamaneni-ma kaliva koyona Setani nimane himimiyami. <sup>20</sup> Kadu kahalamanena Yaubada Natuna ahe gihobu'ela, ada halamana giveleda be higa Yaubada Bana anakaibe velemo'ena ma kanahalamanena. Ada ide Yaubada Bana velemo'ena amanadi buye kave'atutamo'aida, higa Natuna Yesu Keliso buye kave'atutamo'aida. Bana'e au Yaubada velemo'ena ada Bana'e yawai-vagahida inubana.

<sup>21</sup> Natukweyao, wana'itave'avimi be tove'alololo yadi nuwanuwa fwayafwayana keke Yaubada yana abaga ase'asemiya hinalemani.

(Iya Yoni bonaku.)

**Yaubada Bonana Veyao Ivaguna Bona  
Iduna  
The New Testament in the Iduna Language of Papua  
New Guinea  
Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 11 Nov 2022 from source files dated 22 Nov 2019

73458371-ad55-5c77-8b6b-5eca8d58f667